



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“ broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2019. GODINU STRANKE DEMOKRATSKE AKCIJE

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole.	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE	5
5. NALAZI I PREPORUKE REVIZIJE	5
5.1 NALAZI.....	5
5.2. PREPORUKE	9

MIŠLJENJE REVIZORA

Služba za reviziju finansiranja političkih stranaka je izvršila pregled godišnjeg finansijskog izvještaja Stranke demokratske akcije za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2019. godine, utvrđeno je da je Stranka demokratske akcije prekršila odredbe člana 4. stav (1), člana 5. stav (4), člana 6. stav (2) i (3), člana 11. stav (1) i člana 12. stav (1) i (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornjih napomena, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Stranke demokratske akcije za 2019. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2019. godinu, Stranka demokratske akcije se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	64.231,15	1,46
2.	Prilozi fizičkih lica (3-a)	868.184,73	19,82
3.	Prilozi pravnih lica (3-b)	49.510,00	1,13
4.	Prihodi od imovine (3-c)	50.392,36	1,15
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	47.486,94	1,09
7.	Prihodi iz budžeta (3-f)	3.274.874,67	74,76
8.	Prihodi od propagande (3-g)	0,00	0,00
I	Ukupni prihodi (1-8)	4.354.679,85	99,41
II	Ostali prihodi i drugo	25.455,95	0,59
	Izvori finansiranja (I+II)	4.380.135,80	100,00

U godišnjem finansijskom izvještaju stranka je iskazala rashode u ukupnom iznosu od 3.692.038,80 KM.

2. PREDSTAVLJANJE POLITIČKE STRANKE

Naziv političke stranke je Stranka demokratske akcije. Skraćeni naziv stranke je SDA.

Stranka demokratske akcije je Rješenjem broj: R-I-7/90 od 13.06.1990. godine upisana u registar Višeg suda u Sarajevu, a potom u registar poslovnih subjekata kod Općinskog suda u Sarajevu, gdje se vodi pod brojem: 065-0-RegZ-16-0003353.

Sjedište političke stranke je u Sarajevu, Mehmeda Spahe 14.

Lice ovlašteno za zastupanje stranke je Bakir Izetbegović, predsjednik stranke.

Lice ovlašteno za podnošenje finansijskih izvještaja za 2019. godinu je Muamera Mulić.

Prema podacima iz godišnjeg finansijskog izvještaja za 2019. godinu, organizacionu strukturu Stranke demokratske akcije čine:

- Centrala SDA,
- 9 kantonalnih odbora,
- 6 regionalnih odbora,
- Gradski odbor Mostar,
- 115 općinskih/opštinskih odbora i
- Organizacioni odbor SDA u Brčko distriktu BiH.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Stranke demokratske akcije za 2019. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole godišnjeg finansijskog izvještaja Stranke demokratske akcije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju obavila je reviziju i pregled finansijskih izvještaja Stranke demokratske akcije u periodu od 2004. do 2018. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršene revizije godišnjeg finansijskog izvještaja za 2018. godinu, Služba za reviziju je izdala Izvještaj o reviziji sa mišljenjem revizora, nalazima revizije i preporukama stranci da: da finansijska sredstva osigurana za finansiranje političke stranke koristi isključivo za ostvarivanje ciljeva utvrđenih svojim programom i statutom, da vodi evidenciju o priložima, bez obzira na koji način ih ostvaruje, da dobrovoljne priloge u novcu uplaćuje na transakcijski račun Centrale stranke, da se ne finansira iz izvora koji su političkim strankama zabranjeni, da poslovne knjige vodi u skladu sa računovodstvenim propisima i da obrati pažnju na ispravnost i vjerodostojnost knjigovodstvenih isprava, da uspostavi blagovremene i potpune evidencije o prihodima i rashodima i obavezama, da u potpunosti primjenjuje principe i pravila blagajničkog poslovanja i da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2019. godinu, utvrđeno je da Stranka demokratske akcije nije ispoštovala preporuke revizije.

5. NALAZI I PREPORUKE REVIZIJE

5.1 NALAZI

a) Pregledom godišnjeg finansijskog izvještaja utvrđeno je da je Stranka demokratske akcije prekršila odredbe člana 4. stav (1)¹ Zakona o finansiranju političkih stranaka.

Stranka demokratske akcije je dostavila finansijski plan utroška sredstava za 2019. godinu kojim je predvidjela ukupne troškove u iznosu od 4.284.000,00 KM. Uvidom u godišnji finansijski izvještaj stranke utvrđeno je da je stranka u 2019. godini ostvarila ukupne rashode u iznosu od 3.692.038,80 KM.

¹ U skladu sa odredbom iz člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog Zakona može koristiti isključivo za ostvarivanje ciljeva utvrđenih svojim programom i statutom.

Pregledom godišnjeg finansijskog izvještaja i druge finansijske dokumentacije, te analizom strukture ostvarenih troškova, utvrđeno je da je Stranka demokratske akcije sredstva u iznosu od 244.968,32 KM utrošila mimo svog finansijskog plana rashoda, odnosno programa utroška sredstava za 2019. godinu.

- (1) Finansijskim planom za 2019. godinu stranka nije predvidjela troškove, koje je ostvarila u ukupnom iznosu od 151.224,79 KM, kako slijedi: troškove platnog prometa u iznosu od 33.748,02 KM, troškove iz prethodnih godina u iznosu od 27.488,28 KM, ostale troškove u iznosu od 20.502,25 KM, troškove sitnog inventara i auto guma u iznosu od 14.508,14 KM, troškove obezbjeđenja u iznosu od 10.451,70 KM, troškove grijanja u iznosu od 9.925,11 KM, troškove ulaganja u tuđa sredstva u iznosu od 9.567,20 KM, troškove održavanja opreme u iznosu od 9.508,55 KM, troškove knjigovodstvenih usluga u iznosu od 9.085,60 KM, troškove premije osiguranja imovine u iznosu od 3.408,94 KM, troškove zdravstvenih usluga u iznosu od 1.397,00 KM, troškove stručnih publikacija, časopisa i novina u iznosu od 1.334,00 KM i troškove zakupa vozila u iznosu od 300,00 KM.
- (2) Stranka je troškove zakupa poslovnih prostora i ostalih zakupnina planirala u iznosu od 120.000,00 KM, a iste je ostvarila u iznosu od 157.497,54 KM, što je za 37.497,44 KM više od planiranog iznosa.
- (3) Stranka je u poslovnim knjigama i finansijskom izvještaju iskazala troškove advokatskih usluga, sudske troškove, sudska izvršenja i vansudska poravnanja u ukupnom iznosu od 306.246,09 KM, a planirala ih je kao troškove kamata 2019. godine, u iznosu od 250.000,00 KM, što je za 56.246,09 KM više od planiranog iznosa.

Na osnovu svega prethodno navedenog, utvrđeno da je Stranka demokratske akcije prekršila odredbe člana 4. stav (1) Zakona o finansiranju političkih stranaka.

b) Pregledom godišnjeg finansijskog izvještaja utvrđeno je da je Stranka demokratske akcije prekršila odredbe člana 5. stav (4) Zakona o finansiranju političkih stranaka.

Stranka demokratske akcije nije evidentirala nenovčanu donaciju u iznosu od 21.250,41 KM, koju je ostvarila prilikom nabavke poslovnog prostora u Tesliću.

Uvidom u kopiju notarski obrađene isprave, broj: OPU-IP-334/2015 od 26.11.2015. godine, i notarski obrađene isprave, broj: OPU-IP-03/2019 od 15.01.2019. godine, kopiju ugovora političke stranke sa Raiffeisen bankom o pristupanju dugu od 21.05.2012. godine, Rješenje o uknjižbi prava vlasništava nad nekretninom, broj: 21.46/714.1-88/19, izdato 21.02.2019. godine od strane Republičke uprave za geodetske i imovinsko-pravne poslove Banja Luka područna jedinica Teslić, kao i poslovne knjige stranke, utvrđeno je da je Stranka demokratske akcije za nabavku stambeno poslovne zgrade površine 154 m² i dvorišta stambeno poslovne zgrade površine 197 m² isplatila sredstva u iznosu od 98.749,59 KM.

Kupoprodajna cijena, ugovorena između prodavca nekretnine, fizičkog lica i Stranke demokratske akcije prema navedenoj notarski obrađenoj ispravi iznosila je 120.000,00 KM.

Nabavkom nekretnine po cijeni koja je za 21.250,41 KM niža od cijene ugovorene sa prodavcem, politička stranka je ostvarila donaciju, koju je, u skladu sa odredbama člana 5. stav (4) Zakona o finansiranju političkih stranaka bila obavezna evidentirati u poslovnim knjigama i istu prijaviti u finansijskom izvještaju.

c) Stranka demokratske akcije prekršila je odredbe člana 6. stav (2)² i (3)³ Zakona o finansiranju političkih stranaka.

- (1) Pregledom godišnjeg finansijskog izvještaja, utvrđeno je da stranka, priloge od fizičkih lica u iznosu od 338.252,01 KM i priloge pravnih lica u iznosu od 36.700,00 KM nije uplaćivala na transakcijski račun Centrale stranke, čime je prekršila odredbe člana 6. stav (2) Zakona o finansiranju političkih stranaka.

U skladu sa odredbama člana 6. stav (2) Zakona o finansiranju političkih stranaka, dobrovoljni prilozi u novcu uplaćuju se na transakcijski račun centrale političke stranke.

- (2) Politička stranka je ostvarila nenovčanu donaciju, kao što je navedeno u nalazu pod tačkom b) stav (1), koja za 11.250,41 KM prelazi limit propisan Zakonom o finansiranju političkih stranaka.

d) Stranka demokratske akcije prekršila je odredbe člana 11. stav (1)⁴ i člana 12. stav (1)⁵ i (4)⁶ Zakona o finansiranju političkih stranaka.

Pregledom godišnjeg finansijskog izvještaja i druge finansijske dokumentacije, utvrđeno je da Stranka demokratske akcije u poslovnim knjigama i godišnjem finansijskom izvještaju nije uspostavila potpune i tačne evidencije o prihodima, rashodima i obavezama, čime je prekršila računovodstvene propise i odredbe člana 11. stav (1) i člana 12. stav (1) Zakona o finansiranju političkih stranaka. Stranka nije obrasce godišnjeg finansijskog izvještaja za 2019. godinu popunila u skladu sa Pravilnikom o godišnjim finansijskim izvještajima političkih stranaka - u daljem tekstu: Pravilnik, čime je prekršila odredbe člana 12. stav (4) Zakona o finansiranju političkih stranaka..

- (1) Uvidom u Izvještaj o računima pravnog lica koji se vodi kod Centralne banke BiH utvrđeno je da je stranka tokom 2019. godine, imala dva računa, koje nije prijavila na obrascu 2. (pregled prometa svih transakcionih računa političke stranke) godišnjeg finansijskog izvještaja, čime je prekršila odredbe člana 11. Pravilnika.

Stranka nije prijavila transakcijske račune, broj: 3387202213807141 i 3387304820086168, koji su otvoreni kod UniCredit banke.

U postupku pregleda finansijskog izvještaja, stranka je dostavila potvrde od UniCredit banke, na kojima je navedeno da na pomenutim računima nije bilo prometa tokom 2019. godine.

- (2) Politička stranka nije uspostavila evidencije, niti je u finansijskom izvještaju prijavila nenovčanu donaciju u iznosu od 21.205,41 KM, koju je ostvarila kroz nabavku poslovnog prostora, kao što je navedeno u nalazu pod tačkom b).
- (3) Pregledom godišnjeg finansijskog izvještaja i druge finansijske dokumentacije, utvrđeno je da stranka nije iskazala tačne podatke o rashodima, čime je prekršila odredbe člana 21. i 22. Pravilnika.

² Dobrovoljni prilozi u novcu uplaćuju se na transakcijski račun centrale političke stranke.

³ Ukupan iznos priloga fizičkog lica u jednoj kalendarskoj godini ne smije prelaziti iznos od 10.000,00 KM.

⁴ U skladu sa odredbom člana 11. stav (1) Zakona o finansiranju političkih stranaka, politička stranka je dužna voditi poslovne knjige u skladu sa računovodstvenim propisima. U skladu sa odredbom iz člana 12. stav (1) Zakona dužna je uspostaviti evidencije o svim prihodima i rashodima, dok je u skladu sa odredbom iz člana 12. stav (4) dužna podnositi finansijski izvještaj u formi koju odobri Centralna izborna komisija Bosne i Hercegovine.

⁵ Politička stranka vodi evidenciju o svojim prihodima i rashodima.

⁶ Do 31.03. naredne godine politička stranka podnosi finansijski izvještaj u formi koju odobri Centralna izborna komisija BiH.

- Stranka demokratske akcije je u godišnjem finansijskom izvještaju prijavila rashode u iznosu od 3.692.038,80 KM, dok je u Bilansu uspjeha evidentirala rashode u iznosu od 3.688.979,00 KM, što je za 3.059,80 KM više od iznosa evidentiranog u Bilansu uspjeha.
 - U godišnjem finansijskom izvještaju, stranka nije iskazala troškove zakupa poslovnog prostora GO SDA Mostar, dok je uvidom u ugovor o sporazumnom raskidu ugovora o zakupu poslovnog prostora, sa Gradom Mostarom, broj: 05/2-25-8542/19 od 27.05.2019. godine, utvrđeno da su isti iznosili 1.000,00 KM⁷.
 - Troškove zakupa poslovnog prostora OO SDA Lukavac za 2019. godinu, u iznosu od 2.160,00 KM, politička stranka nije evidentirala u periodu u kome su nastali, već ih je evidentirala naredne godine i to rashode iz proteklih godina.
- (4) Politička stranka je u finansijskom izvještaju za 2019. godinu pogrešno klasifikovala iznos od 306.246,09 KM kao troškove advokatskih usluga i sudske troškove. Uvidom u poslovne knjige, utvrđeno je da se radi o izmirenju obaveza koje su nastale u ranijem periodu, po kojima su vođeni sudski sporovi, kao i isplata kamata po sudskim rješenjima.
- (5) Pregledom su utvrđeni nedostaci kod računa dobavljača, koji su knjigovodstvene isprave o nastalim poslovnim događajima. U skladu sa računovodstvenim propisima, knjigovodstvena isprava mora biti potpuna, istinita, računski tačna i uredna, sačinjena tako da omogućava potpun uvid u vjerodostojnost dokumenta. Sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

Računi na osnovu kojih je Stranka demokratske akcije evidentirala i platila troškove propagande i reprezentacije ne predstavljaju ispravne i vjerodostojne knjigovodstvene isprave.

Uvidom u račune pravnih lica „Color Art“ d.o.o. Fojnica broj: 10-1/2019 od 07.01.2019. godine u iznosu od 2.992,86 KM i „Print-GS“ d.o.o. Travnik broj: 00009/19 od 23.01.2019. godine u iznosu od 2.035,80 KM, „Ibes“ d.o.o Sarajevo broj: 000337 od 31.05.2019. godine u iznosu od 3.510,00 KM i broj: 000534 od 16.09.2019. godine u iznosu od 7.218,90 KM, utvrđeno je da pomenuti računi nisu potpisani od strane korisnika usluga.

- (6) Stranka demokratske akcije u poslovnim knjigama nije uspostavila tačne evidencije o svojim obavezama, čime je prekršila računovodstvene propise. U finansijskom izvještaju, na obrascu 5 (*obaveze političke stranke*), obaveze nije prijavila u skladu sa odredbama člana 24. Pravilnika.
- Kod Gradskog odbora SDA Mostar stranke je u godišnjem finansijskom izvještaju iskazala obaveze prema dobavljaču „Grad Mostar“ u iznosu od 117.224,08 KM. Uvidom u Izvod otvorenih stavki sa Gradom Mostarom na dan 31.12.2019. godine, utvrđeno je da je Stranka demokratske akcije imala obavezu prema ovom dobavljaču u iznosu od 50.537,78 KM.
 - U poslovnim knjigama za 2019. godinu i obrascu 5 izvještaja, koji je podnijela Centralnoj izbornoj komisiji BiH, stranka je iskazala obaveze iz ranijeg perioda prema: dobavljaču „Centrotrans“ u iznosu od 21.800,00 KM, dobavljaču „Mita“ Group u iznosu od 8.000,00 KM i dobavljaču Hotel „Bosnia“ u iznosu od 8.792,50 KM. Uvidom u Izvod otvorenih stavki na dan 31.12.2018. godine, utvrđeno je da Stranka demokratske akcije nema obaveze prema dobavljačima: „Centrotrans“, „Mita“ Group i Hotel „Bosnia“⁸.

⁷ Ugovor o zakupu poslovnog prostora sa Gradom Mostar je raskinut dana 23.05.2019. godine.

⁸ Navedeno u Izvještaju o reviziji godišnjeg finansijskog izvještaja za 2018. godinu i postizbornog finansijskog izvještaja - Opći izbori 2018. godine Stranke demokratske akcije broj: 03-07-6-281/20 od 21. oktobra 2020. godine.

- Politička stranka je na dan 31.12.2019. godine iskazala obavezu prema pravnom licu „Bemust“ d.o.o. Sarajevo, u iznosu od 37.573,36, te navela da je ista nastala 10.12.2018. godine. Međutim, uvidom u finansijske izvještaje Stranke demokratske akcije iz ranijeg perioda, utvrđeno je da je stranka pomenutu obavezu iskazala i 2016. godine, sa datumom njenog nastanka 10.12.2016. godine. Protiv pravnog lica „Bemust“ d.o.o. Sarajevo pokrenut je stečajni postupak kod Općinskog suda u Sarajevu 20.10.2016. godine.
- U finansijskom izvještaju stranka je iskazala je negativan saldo obaveza prema dobavljačima u iznosu od 17.413,79 KM, što je neprimjereno računovodstvenim načelima. Iskazani negativni saldo obaveza je rezultirao prijavom manjeg iznosa ukupnih obaveza političke stranke za 17.413,79 KM. Navedeno potvrđuje i činjenicu da politička stranka nema potpune evidencije ni o svojim troškovima.

Troškovi izborne kampanje na prijevremenim izborima za načelnika u Općini Bužim, Općini Bosanski Petrovac i Općini Kakanj.

Tokom 2019. godine Stranka demokratske akcije je učestvovala na prijevremenim izborima za načelnika Općine Bužim, Općine Bosanski Petrovac i Općine Kakanj koji su održani 17.02.2019. godine.

Prema odredbama člana 15.10 Izbornog zakona Bosne i Hercegovine politička stranka za potrebe izborne kampanje ne smije potrošiti više od 0,30 odnosno 0,20 KM⁹ po biraču u svakom izbornom krugu, prema broju birača koje je objavila Centralna izborna komisija BiH. Stranka demokratske akcije je u svrhu izborne kampanje, a prema podacima Centralne izborne komisije BiH, mogla da potroši sredstva u iznosu od 16.801,02 KM, i to za načelnika Općine Bužim u iznosu od 4.542,60 KM, načelnika Općine Bosanski Petrovac u iznosu od 1.999,20 KM i za načelnika Općine Kakanj u iznosu od 10.258,50 KM.

U godišnjem finansijskom izvještaju koji je podnijela Centralnoj izbornoj komisiji BiH, stranka je iskazala troškove izborne kampanje za prijevremene izbore za načelnika u općinama Bužim, Bosanski Petrovac i Kakanj u iznosu od 10.775,59 KM.

5.2. PREPORUKE

Preporučuje se Stranci demokratske akcije da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva osigurana za finansiranje političke stranke koristiti isključivo za ostvarivanje ciljeva utvrđenih svojim programom i statutom,*
- *da vodi evidenciju o priložima, bez obzira na koji način ih ostvaruje,*
- *da ne prima priloge iznad zakonom propisanog limita,*
- *da dobrovoljne priloge u novcu uplaćuje na transakcijski račun Centrale stranke,*
- *da vodi poslovne knjige u skladu sa računovodstvenim propisima, odnosno da vodi tačne evidencije o svojim prihodima, rashodima i obavezama,*

⁹ Član 15.10 stav (2) propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine općine, članove Narodne skupštine RS i predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, predsjednika i podpredsjednika RS, odnosno 20 feninga za izbore za članove kantonalnih skupština.

- *da obrati pažnju na ispravnost i vjerodostojnost knjigovodstvenih isprava i*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.*

KOMENTAR

U ostavljenom roku, Stranka demokratske akcije je dostavila očitovanje na Preliminarni izvještaj o pregledu godišnjeg finansijskog izvještaja za 2019. godinu. Stranka je u skladu sa odredbama iz člana 14. stav (3) Zakona o finansiranju političkih stranaka dobrovoljno otklonila neke od nedostataka. Uz očitovanje, stranka je dostavila dokaze o vraćanju zabranjenih donacija koje je primila od pravnih lica: „Emir Commerc Kurbegović“ d.o.o. Sanski Most u iznosu od 500,00 KM; „Ibra“ d.o.o. Travnik u iznosu od 1.000,00 KM; „Grand 99“ d.o.o. Travnik u iznosu od 1.000,00 KM; „Bajrić-BN“ d.o.o. Travnik u iznosu od 1.000,00 KM; „Vlašić Gradnja“ d.o.o. Travnik u iznosu od 3.000,00 KM i „Bios“ d.o.o. Visoko u iznosu od 3.000,00 KM. Takođe, stranka je dostavila dodatne dokaze o prihodima iz budžeta: Unsko-sanskog kantona, Kantona Sarajevo, Srednjo-bosanskog kantona, Zeničko-dobojskog kantona, Općine Bosanska Krupa, Općine Živinice, i Općine Žepče; dokaze o vlasništvu nad poslovnim prostorima u Brezi, Milićima, Trnovu, Maglaju, Čeliću, Lukavcu, Kiseljaku, Fojnici, Gračanici i Novom Travniku, te je Služba za reviziju na osnovu istih, kao i argumentovanih primjedbi djelimično korigovala nalaze revizije iz Preliminarnog izvještaja.

Pomoćnik revizora
Mr.sc. Goran Cicović

Šef Službe za reviziju, revizor
Mr.sc. Hasida Gušić